

Uunga siunnersuut: Utoqqalinersiaqarneq pillugu Inatsisartut inatsisaata allanngortinnissaa pillugu Inatsisartut inatsisaat nr. xx, xx. xxx 2019-imeersoq
(Utoqqalinersianik ikilisitsisoqartinnagu aningaasanik innuttaasup akissarsiarisinnaasaanik qaffaaneq)
(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Saqqummiussissut
(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)
Siullermeerneqarnera

Utoqqalinersiat pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut matumuuna Naalakkersuisut sinnerlugit saqqummiutissavara.

Siunnersuuteqarnikkut siunertaavoq suliffeqarnermit soraarnerussutisiassanik aamma nammineerluni aningaasalersukkanik soraarnerussutisiassanik aqqissuussinnermut aamma soraarinnngoreerluni suliffeqarnermut attaveqaannarnissamut piomassuseqarnerup patajaallisarneqarnissaa.

Utoqqalinersiallit suliffeqaannarnissamut aningaasaqarnikkut kajumissaaserneqarnissaat qulakkeerniarlugu, siunnersuutikkut utoqqalinersiat soraarnerussutisiaraqarnermut tapisiartaasa ilanngaataat 100.000 koruuninik qaffanneqarput annikilliartuaartitsisarnermullu procenti apparneqarluni. Ilanngaatit tassaapput utoqqalinersiat ilaat ikilisinneqanngitsut, naak utoqqalinersialik saniatigut isertitaqartaraluartoq. Annikillisitsiartuaarnermut procenti tassaavoq procentinngorlugu annertussuseq utoqqalinersianut annikillisitsissutaasoq.

Ullumikkut utoqqalinersiat saniatigut isertitat qaffakkiartornerat ilutigalugu ikiliartortinneqartarput. Tamanna isumaqarpoq, koruunimik akissarsiaqaraanni tassanngalu akileraarutitut akiliisarluni inuup utoqqalinersiai ikilisikkiartorneqalersartut. Taamaammat utoqqalinersialinnut suliffeqarnermiiginnarnissaq utoqqalinissamulluunniit ileqqaagaqarnissaq aningaasaqarnikkut killilimmik pissarsissutaasinnaasassapput.

Utoqqalinersiallit suliffeqarfimmiiginnarnissaannut aningaasaqarnikkut kajumissaaserneqarnissaat qulakkeerniarlugu siunnersuutikkut ilanngaat annertusineqarpoq, taamaalillunilu pensionisiantut tapiliussanut aamma tunngaviusumik pensionisiantut tunngatillugu saniatigut isertitat qaffakkiartortillugit qaqugu annikillisitsiartorneq aallartissasoq aamma unitsinneqassasoq pillugit killissarititaasut nikingalersillugit. Inatsisintut maannakkut atuuttunut tunngatillugu annikillisitsiartortarneq imaalillugu appartinneqassaaq, utoqqalinersiat aningaasartaasa annikillisitsissutitaat, ilanngaatissat "nungunneqarpata", aammattaq ikilisussanngorlugit. Taamaalilluni taamatut siunnersuuteqartoqarneratigut saniatigooralugu isertitaqaralarluni utoqqalinersiallip utoqqalinersiami ilaa annertunersoq tigungmiinnarsinnaanngussavaa.

Siunertaavoq inatsimmut allannguutaasut ukiut pingasut ingerlaneranni naliliivigineqassasut paasiniarlugu suliffeqarnissamik neqerooruteqarnermi allannguutit ilumut kissaatigineqartutut sunniuteqarsimanersut, utoqqalinersianullu aningaasartuutissat akileraarutigullu isertitassatut missiliorneqartut imminnut naapertuunnersut.

Taamatut oqaaseqarlunga siunnersuut Inatsisartunut akuersaallaqqullugu oqaluuserisassanngortippara.